



**Acta provisional del Plenu ordinariu**  
**Conseyu d'Estudiantes de la Universidad d'Uviéu**

- **Llugar:**
  - Escuela Téunica Superior d'Inxenieros de Mines d'Uviéu.  
Despachos del Conseyu d'Estudiantes. 2ª Planta
  
- **Día y Hora:**
  - Miércoles 21 d'avientu de 2011
  - Primera convocatoria 17:30 hores
  - Segunda convocatoria 18:00 hores
  
- **Asistentes:**

**Facultá de Derechu**

Adrián Arias Mieres  
Sergio Navas Suárez  
Paula González García

**Facultá de Filosofía y Lletres**

Jesús Sanjurjo Ramos  
Luis Rodríguez Fernández

**Facultá de Psicoloxía**

Aroa Gutiérrez Marín  
Diana Jäkel Riera

**Facultá de Formación del Profesoráu y Educación**

Aridane Cuevas Rodríguez  
Santiago Fano Méndez  
Rodrigo Fernández Joglar

**Facultá de Medicina y Ciencies de la Salú**

Francisco Trapiello Valvuela  
Rubén Rosón Fernández

**Escuela d'Inxeniería Informática**

Jorge Cabal Amieva

## **Facultá de Biología**

Héctor Piernavieja Cachero

## **Facultá d'Economía y Empresa**

Alejandro Diego Delgado Rivero

## **E.S. Marina Civil**

Aitor Rocha García

## **Escuela Politécnica de Mieres**

Alejandro Mier Rodríguez

- **N'algamando'l quórum necesariu, entama'l plenu en segunda convocatoria a les 18:00 hores col ORDE DEL DÍA que vien darréu:**

### **1- Aprobación del Acta del Plenu con fecha 10 de payares.**

Apruébase l'acta por unanimidá.

Jorge Cabal amiesta la non-anexón de los anexos al acta mentáu. Estos anexos son los documentos trataos nel Plenu y que van tar archivaos nel ficheru d'actes nel despachu del Conseyu d'Estudiantes.

Nesti sen, Rubén Rosón plantea un funcionamientu nuevu d'accesu a la información, qu'él mesmu xestionó hasta'l momentu. D'esta miente, los documentos que remane'l Conseyu d'Estudiantes van tar a disposición de tolos Conseyeros y Conseyeres nel Despachu del organismu, xestionaos pola becaria d'alministración. Del mesmu mou, propón la creación d'una Intranet per Dropbox.

Santiago Fano propón que la Comisión d'Estudiantes s'encargue de tener al día estos documentos.

### **2- Revisión de gastos dende'l mes de setiembre.**

Rubén Rosón espón el funcionamientu de los trámites para facer los gastos que necesita'l Conseyu, un funcionamientu ralentizáu poles xestiones cola alministrativa encargada nel Vicerrectoráu d'Estudiantes.

Amás, esplica la situación del últimu pidíu, del que se va facer informe en cuantes toles factures tean disponibles.

El material mercáu queda disponible pa les delegaciones, pudiendo los representantes de les mesmes coyelu y apuntalu.

### **3- Esposición de les llínies de trabayu de les comisiones.**

Héctor Piernavieja esplica les llínies de trabayu de la Comisión de Cultura, destacando la organización d'una semana cultural que, lo más seguro, va distribuyise

en xornaes pal ecoloxismu, la diversidá de xéneru, la cooperación y la ponencia d'una figura conocida, como pue ser el biólogu y activista Richard Dawkins.

Rubén Rosón espón, per parte de la Comisión d'Estudiantes y Reglamentos, el funcionamientu que se sigue de modificación de reglamentos, qu'anguaño la Comisión trabaya na red.

Santiago Fano fala como miembru de la Comisión de Normalización Llingüística, esplicando'l trabayu de traducción de documentación del Conseyu d'Estudiantes (actes, convocatories, cartelos, comunicación en redes sociales, etc.). Del mesmu mou, espón les llínies de trabayu de la Comisión pa xineru y febreru, como la busca de contautos con asociaciones pola normalización de la llingua asturiana (Xunta pola Defensa de la Llingua Asturiana, Iniciativa pol Asturianu, Trafego, Academia de la Llingua Asturiana), la idea de sacar una xornada sobre llingua asturiana na Universidá asina como una campaña audiovisual empobinada a informar al estudiantáu de los sos derechos como asturianofalantes na Universidá d'Uviéu.

En cuantes a la Comisión de Cooperación y Aición Social, Diana Jäkel propón axuntala cola de Cultura, en viendo l'interés nulu per parte de los integrantes d'esta Comisión. Santiago Fano propón facer les xuntes de mou sucesivu al de les de Cultura, col envís de qu'una Comisión tan importante nun desapaeza y pel momentu tea sofitada polos miembros de la de Cultura. Arriendes d'esto, Rubén Rosón sofita la esistencia d'esta comisión pa la cual existen proyeutos a esgaya, como'l sofitu al CMPA, les xornaes sobre desigualdá Norte-Sur, Inxenieros ensin Fronteres amás del contautu con ONGs conocíes del ámbitu asturianu.

#### **4- Postura y esixencies del Conseyu d'Estudiantes ante los/les candidates al puestu de Rector/a.**

Rubén Rosón amuesa un documentu (Anexu 1) que recueye delles ideas, que procede a esponer pa que'l plenu les modifique si cree necesario.

A nivel suprauniversitariu debátense les siguientes cuestiones:

Santiago Fano apunta que les peticiones han facese por igual a toos los candidatos.

Alejandro Delgado pide una mayor collaboración col Conseyu Escolar del Principáu.

Amás, decídese que'l conseyu nun se posicionará por un candidatu/a.

A nivel d'Universidá:

Jorge Cabal y Alejandro Mier creen necesario esclariar y tener en cuenta la situación de la Escuela de Mines.

Santiago Fano fala de la necesidá de poner n'usu los documentos creaos en rellación col Réxime de Pogresu y Permanencia. Asina mesmo, cree necesaria la revisión d'una adaptación pedagóxica real al Plan Boloña, un cambéu de metodoloxía docente que

s'entien de nun se ta produciendo y que debería regulase con inspecciones y evaluaciones. Per último, amestar la posibilidad de trabayar conxuntamente con un nuevu cargu en rellación al defensor universitariu.

Sergio Naves cree necesariu la creación de nuevos mecanismos de democracia más direuta ente estudiantes. Mecanismos asemeyaos a los referéndum. Propón la organización d'una charra con tolos candidatos, abierta dafechu a tolos y toles estudiantes, un alderique organizáu.

Acéutase'l documentu presentáu colos cambeos apautaos.

### **5- Llínies d'actuación pal añu 2012.**

Previamente espúnxose'l modelu de coordinación que fomente la difusión d'información del presidente hacia los demás consejeros y consejeres.

### **6- Viaxe a Terrasa a la CREUP y conclusiones.**

Rubén Rosón espón la dinámica del alcuentru al qu'acudió aportando les valoraciones sobre'l funcionamientu d'esti órganu.

Tres una llarga esposición de les esperiencias vivíes nes xornaes, Rubén anuncia la creación d'un informe cola so posición personal acerca de por qué'l Conseyu d'Estudiantes de la Universidá d'Uviéu nun debe pertenecer a la CREUP. Cuestiones que se van aldericar nel próximu plenu.

### **7- Ruegos y entrugues.**

Héctor Piernavieja informa de la petición d'ayuda pal viaxe de Bioloxía, petición qu'asciende a unos 400 euros pa ponencies.

Alejandro Mier recalca la importancia de marcar una llinia d'actuación ante la nula participación de dalgunos consejeros/es. Cuestión que tendrá que revisar la Comisión d'Estudiantes y Reglamentos.

Dende'l campus d'El Milán infórmase de la intención d'organizar una selmana cultural pa marzu y se pide apoyu'l Conseyu. Dende Económiques pídense, d'igual miente, apoyu pa la realización d'unes xornaes coincidiendo col día de la patrona.